



FUNA E, SE A LE MEA E TE TAGI AP SAUNIA E MARK R. PUGH

O Molimau e Toatele o Lona Toetu

“O u te talitonu i le toatele o molimau i le Toetu o le Faaola o loo maua o latou aafiaga ma molimau i le Feagaiga Fou—o Peteru ma ana soa o le Toasefululua ma le pele, mama a’ia’i o Maria le Makatala, faatasi ai ma isi. Ou te talitonu i molimau o loo maua i le Tusi a Mamona—o Nifae le Aposetolo ma le motu o tagata e lemailoa i le laueleele o Nuumau, faatasi ai ma isi. Ma ou te talitonu i le molimau a Iosefa Samita ma Sini Rikitone o e, i le mavae ai o le tele o isi molimau na folafola mai ai le molimau sili o lenei tisipenisione mulimuli, ‘o loo soifua o ia! Aua sa ma vaai ia te ia.’ I lalo o le vaaiga a Ona fofoga e silafia mea uma, ou te tu atu ai o se molimau, o Iesu le Nasareta o le Togiola toetu, ma ou te molimau atu i mea uma o mulimuli mai e uiga i le *moni* o Lona Toetu. Talosia ia outou maua le talitonuga maumaututu ma le mafanafana o lena lava molimau e tasi.”

Elder D. Todd Christofferson o le Korama a Aposetolo e Toasefululua, “O Le Toetu a Iesu Keriso,” *Liahona*, Me 2014, 114.

Faaaogaaga e le Tagata Lava Ia: E ui tatou te le i ai ma i latou na vaai i le tino toetu ma le atoatoa o le Faaola, ae e mafai lava ona tatou tutu atu o ni molimau ia te Ia i le taimi nei. E mafai ona avea o Ia ma taulaiga o o tatou olaga e le aunoa, tusa lava po o le a le taimi po o le nofoaga tatou te i ai. O taimi taitasi tatou te ofo atu ai o tatou loto ma lima e auauna atu ai i isi, faaali atu le agamalu, agalelei, ma le faaloalo i tagata uma; puipuia le upumoni; ma faasoa atu a tatou molimau o le talalelei, tatou te tutu atu o ni molimau faamaoni a Iesu Keriso.

FAAMATALAGA MA LE WALK WITH ME, SAUNIA E GREG OLSEN, LE MAFAI ONA KOPINA

Tatou Te Le Tau Savavali Na o i Tatou

“O se tasi o faamafanafanaga sili o lenei vaitau o le Eseta o le, ona sa savalia e Iesu se ala umi ma le pagatia mafatia na o ia lava, *tatou* te tau le faia ai lena mea. O Lana malaga toatasi na aumaia ai se ‘au toatele mo la tatou vaega itiiti o lena ala—o le tausiga alofa mutimutivale a lo tatou Tama i le Lagi, le mafutaga e le uma a lenei Alo Pele, o le meaalofa atoatoa o le Agaga Paia, o agelu i le lagi, o tagata o aiga i itu uma o le veli, perofeta ma aposetolo, faiaoga, taitai, ma uo. O nei mea uma ma le tele o isi ua tuuina mai e fai ma a tatou soa i la tatou malaga i le tino nei ona o le Togiola a Iesu Keriso ma le Toefuataiga o Lana talalelei. Ua alagaina mai i le tumutumu o Kalevaria le upumoni e faapea, o le a le tuua lava na o i tatou e aunoa ma se fesoasoani, e ui o nisi taimi tatou ono lagonaina ai ua [tuuaunoa] i tatou. . . .

“ . . . Talosia ia tatou tutu i autafa o Iesu Keriso ‘i taimi uma ma i mea uma, ma i nofoaga uma [tatou] e i ai, e oo lava i le oti,’ aua e moni lava o le ala lea sa Ia tu ai i o tatou autafa ina *ua* oo i le oti ma ina ua tu na o Ia lava.”

Elder Jeffrey R. Holland o le Korama a Aposetolo e Toasefululua, “Sa Leai Se Tasi na I Ai Faatasi ma Ia,” *Liahona*, Me 2009, 86.

Faaaogaaga e le Tagata Lava Ia: O Le Eseta Lenei, ia manatua le malaga faaiu, tuuatoatasi a le Faaola. Na Ia ositaulagina mea uma na ia te Ia ina ia mafai ai e oe ma tagata uma i le lalolagi ona faamamaina ma maua le ola e faavavau. Aoao mai Lana faataitaiga atoatoa. Tuu o Ia i ou mafauauga ma i lou loto. Ma ia manatua i taimi uma, e le tuuaunoaina lava i tatou. Talu ai sa Ia onosaia Lana malaga faaiu e na o ia lava, o le a Ia le tuulafoaiina ai lava oe. O Lona alofa mo oe e le uma ma e le masuia, ma ua Ia saunia foi e ofo atu ia te oe le filemu, mafanafana, ma le faamoemoe a o e faaauuina lau lava malaga. O Lana meaalofa o le Togiola e faavavau, ma ua tuuina atu ia te oe. ■

Vaai pe faapefea e le Paseka ona fesoasoani tatou te malamalama ai i le Eseta i le [lds.org/go/41817](https://www.lds.org/go/41817).

